

國朝詩人徵略二編

國朝詩人徵略二編卷五十七

番禺張維屏子樹輯

梁藹如

字遠文號青崖廣東順德人嘉慶十九年進士官
內閣中書有無懈怠齋詩集

君補內閣中書充 文淵閣檢閱 方略館分校

例得議敘僚友梁愼猷自言困苦欲得議叙遷官
君慨然讓之君居官數年居家數十年事親以孝
處已以約待人以厚嘗公車北上已度嶺聞母病
卽遄返生平不侈飲食不飾服御不治園圃居斗

室中好靜坐時跌坐榻上如老僧入定寡嗜慾妻不能育勸納妾舉一子卽不入內室子質弱或以爲言君曰吾兄有六子吾子倘不成立擇兄子入繼可也其天性恬澹類如此至於利入濟物之事則其心惟恐不周其力惟恐不至也嘗謂范文正公義田最可法惜無力行之於是族黨鄉閭貧乏者給以糧米不能婚姻者助以貲財有來借貸者酌多寡應之壬辰歲大祲君倡賑由族而鄉遠近皆效之他如濬溪流以通舟楫修道路以便往來若此者不可枚舉何處已則儉以約而待人則豐

且厚耶此其立心行事當於古人求之若今人則未易數數觀也君好吟詠善書畫著有無怠懈齋詩集詩學陶韋篆學嶧山碑隸學夏承碑草書學右軍真書學魯公行書學坡公畫學一峯老人得其書畫者寸縑尺素皆珍之君善攝生少疾病卒之歲語人曰孔聖七十二予小子安能踰其期耶病數日而卒殮時面如生

贊曰吾聞青崖先生居鄉鄉之人咸愛之敬之先生誠粹然儒者哉然其斷色慾喜趺坐則類乎禪至興酣作草書畫山水濡染淋漓飄飄有仙氣則

又近乎仙於戲先生疇能測之哉

松心文集

中翰自都中歸閉門靜坐默悟道要詩之冲淡適

如其人

嶺表詩傳

仲父青崖中翰著有無怠懈齋詩稿五古近韋柳
五律近王孟集中二體最爲擅場七律亦有可傳
如涿州望樓桑村云無復濃陰映郡門樓桑終古
自名村雲霞尙護青龍氣風雨仍棲赤帝魂大澤
茫茫迷水石平沙莽莽散雞豚行人立馬知何處
指點高原落照昏較之永城李文定公作亦不多

讓

十二石山齋詩話

青崖詩靜心多妙真趣自流已見選本者不復錄

余愛其絕句云門前桑竹已成陰靜對爐香坐擁

衾山鳥也呼行不得一簾春雨落花深

聽松廬詩話

青崖舍人令子小厓

邦俊

學文修行善體親心有

才無命年三十六而卒舍人令姪福草

九圖

既刻

無怠懈齋詩集又刻小崖遺草昨寄示舍人行狀

請余作家傳一篇以備載入新修縣志因記此以

見舍人父子叔姪兄弟之間文章風義各有可傳

不徒書畫藝事之工已也

松心文鈔

標題 遊羅浮

五古

草書歌示姪九圖

七古

摘句

一瀑濺積雪渺渺天風送

白雲洞

雲中一僧歸踏破石上月

景泰寺

山色自千古溪聲流至今

白雲山

宦情江上水歸路夢中山

長天下獨鳥落葉起微波

纖塵不動月初上萬籟無聲花自飛

宿海幢寺

香繞紫薇人跡靜花深

黃閣漏聲遲

春夜

直入

五更夢醒聞啼鳥三月春寒見落花

晚春

空亭落日無人跡黃葉滿山秋氣深

懸壺

許桂林

字同叔一字月南江南海州人嘉慶二十一年舉人揀選知縣有味無味齋詩集

月南於諸經皆有發明尤邃於易通古音撰許氏說音以配說文兼精疇人家言神解特超以宣夜之術無傳撰宣西通四卷阮公元手書談天祕欲

傳宣夜學海深須到鬱洲句贈之卒年四十四甘

泉羅茗香

士琳

從之遊遂以四筭名世

海州文獻錄

月南自題輓聯云只恨著書未了要爲孔聖明一經望後起有人儻與吾徒傳絕學若論短命堪悲

已比顏子多十歲況天上不苦還從老母侍清遊

端坐而逝邦人公請從祀鄉賢

同上

吾弟月南躬行實踐好學深思著有易確毛詩後
箋春秋左傳地名考證穀梁傳年月日釋例四書
因論步緯簡明法味無味齋文集外集駢體文壹
賴詞凡百數十卷藏於家宣西通三卷算牖四卷

已刊行

弁榆山
房筆譚

易確二十卷許桂林撰是書以乾爲主謂全易皆
乾所生謂說經當以經爲主與經合者爲是與經
違者爲非博觀約取於易義實有發明

松心
目錄

月南有談天絕句自註云憲法一度六十分太陽
每日平行五十九分零八秒而每年止春分前三
日秋分後三日此兩日能合平行其餘逐日有盈
縮夏至縮極日行最高冬至盈極日行最卑屏案
日行每日不能滿一度是以有月大有月小是以
三年必須置閏是以積久必有歲差夫以太陽之
健每日差二秒不能行足一度物理不能滿足在

天者且如此而況在人者乎

松心
日錄

標題

擬重修宋史詩

五古

黃侯舞刀行

七古

歸純

許月南作歸純一篇千數百言殆欲合莊
子離騷爲一手可稱奇作

聽松廬詩話

摘句 詩者情之狀詩者景之迹

火潮誠奇觀磊石合下拜

自註云海上月恆有火潮月

黑夜望之燦如萬星

屏案水中之火是謂陰火木元虛海賦有之聽松廬詩話

一事與古反貪乃能寡訟

此語未經人道然世間實

有此原告被告非錢不行於是訟者聞風自息可笑可歎

松軒隨筆

細雨綠山氣長欄紅水紋

雨中過金山

車聲上橋重馬力出山輕

東阿道中

野草精神連夜雨鄉關情緒幾重雲

新安曉行

世上友朋誰似此最相知亦最相思

自註云聽

燕子語如云誰似此最相知亦最相思拈出燕語可補禽言之缺

聽松廬詩話

黃其榮

字則仙福建侯官人嘉慶二十一年舉人江西候補知縣有蒼叢草

則仙自少績學爲鄉先達諸公所器重既登賢書屢上公車不第以大挑一等出爲縣令分發江西將次攝篆因病假歸未幾遂卒論者惜之其友陳筠竹通守檢其遺詩一卷示余詩雖不多而命意措辭要不失溫厚和平之旨筠竹言其子奉樾已舉於鄉則仙生有承明著作之才不克伸於其身當必伸於其子而筠竹惓念故人惟恐其身名俱

泯可謂篤於友誼者矣

聽松廬文鈔

則仙大令悼亡絕句詩十數首中有兩首讀之令人增伉儷之重錄之寒窗伴讀一燈青卿自描花我誦經此景至今忘不得傷心爲仿瘞琴銘風詩不把綠衣鈔早聘桃根強解嘲不意戲言成宿憾此生不買續絃膠

聽松廬詩話

則仙試帖詩頗見藻思紅袖添香伴讀書一首句云心字氤氲氣毛詩窈窕章出句寫香對句寫添香之人語工筆活可稱錦心繡口小欄花韻午晴初句云踏枝來鵲噪似線驗貓睛亦佳

同上

摘句

高堂占鵲喜遊子遂烏私

眼看雙塔小身比衆峯高

夜坐每添新得句晨興補讀未完書

論聽粲花惟恐盡詩如束筍不嫌多

知我心情惟鮑叔登科顏汗爲劉蕡

寄劉薇卿

銷魂大抵惟離別分手何堪屬弟兄

送家秋槎

此老自貪歸櫂穩有人還望濟川才

泥嘗濁酒斟歡伯邀顧清歌唱惱公

爲鄭校書

懶伴襄王行暮雨欲隨坡老學朝雲

作

身隱一時名萬古溪山從此屬嚴家

嚴灘

區昌豪

字光賢號偉川廣東番禺人嘉慶二十一年舉人
官廉州府訓導有葆天爵齋詩文集

先生少失恃育於祖母潘太孺人事祖母及贈公
以孝聞年十五補博士弟子員癸酉舉優行丙子
領鄉薦以祖母老未上公車道光甲辰大挑二等
選授廉州府訓導卒於官年六十九子二人殿揚
武生殿超孫國維國安業儒先生少負文名受知
於朱文正公及韓桂舫尙書生平飭內行篤師誼
急友難性和而介與其師李朗川孝廉仲瑜並爲

鄉里推重

深柳堂
文鈔

廣州城舊宅以黃文裕公故居爲最古香石中翰
門聯云三百年里第十八世書香洵佳話也貨店
則以小東門外永安橋區永利酒店爲最古區偉
川孝廉嘗語余曰吾家酒店始自前明然無徵不
信君盍爲詩以徵之余卽席賦絕句云萬瓦鱗鱗
雉堞遮小東門外一帘斜永安橋畔行人識二百
年前舊酒家偉川喜越日以舊酒爲報

聽松廬
詩話

白朮五錢生薑兩片棗肉兩枚余傳此方脾虛者
服之大效見偉川白朮香中僮煮藥句因記之

同上

區偉川師嘗授經於柳堂時年近六十猶手不釋
卷夜觀書至三鼓始就寢余齋中有廿三史先詹
簿公試叩以歷朝人氏號及地理疆域隨答如響
憶題柳堂云天外帆檣千里月水心樓閣四圍花

猶想見石闌點筆時也

深柳堂詩話

標題

北行述懷

五古

狄武襄遺蹟

七古

摘句

短景催殘臘他鄉動旅愁

草肥人試馬水活客知魚

卅年舊戚能懷我一代傳人更屬誰

懷張南山

青草池塘眠鴨地綠陰門巷養蠶家

題李亭

樂圃

夢裏一韓追絳帳

謂桂船師

燈前三李立青衿

謂姪壻李子黼甥李子星李子輝

三茂才皆從余遊冬夜書懷

古憤難平詩卽史綺懷多泥月兼花

好月留人無倦意寒花供佛有清香

白朮香中僮煮藥紫藤陰下客談詩

夏日柳堂

病起示子黼

紅袖添香消豔福白頭說劍愧邊才

綠迷雙屐尋詩徑紅濕孤篷載酒船

人日雨中

遊杏林莊

覺羅舒敏

字叔夜號時亭別號石舫滿洲正紅旗人有適齋居士集

府君系出

興祖直皇帝第三子甯古塔貝勒索公

諱長阿

之六世孫

也曾王父福公

諱祿

王父富公

諱爾丹

均

贈光祿大夫考伍公

諱拉納

官至閩浙總督

述行

府君聰慧書成誦輒不忘鮮嗜好課誦外惟好畫

往往貌諸家人輒肖嘗自寫真亦肖甚十餘歲卽

吟詩隨手散軼百無一存存者自乙卯年始

述行

年十五九經悉熟好通鑑能舉大意習國書習騎射並皆精通性純孝且友愛兄弟有爭論輒從中排解或以罪歸之輒任受過無少爭述行

年十八來京當差越一載而大父緣事獲咎府君與諸父並戍伊江嘉慶丙辰到戍己未秋蒙

恩賜還府君在戍閉戶讀書以爲讀書必先識字因手摘習用之字以字典爲主搜採諸經訓詁旁及子史日註十餘字錄成四冊顏曰適齋字課述行

癸亥四月朔不肖生命名錫禮今改名崇恩是冬府君

偶患右脇庸醫誤投峻劑遂不起時嘉慶八年癸

亥十一月十五日也距生於乾隆四十二年丁酉

七月享年僅二十七

述行

標題

讀書述志

五古

慘別離

丙辰正月廿五日
出關作七古

摘句

袴下羣兒笑壇前大將雄

韓信嶺

客淚多於雪離愁重似山

三年遷客淚萬里故園心

日蒸林結火

伊麗深山皆千
年木歲久自焚

風暴土成山

馬蹏趁雪千山白花藥經春一路紅

果子溝

未歸早計歸時路爲客偏驚客去多

擬送春林

感極仍垂襟上淚歡深疑向夢中看

蒙恩賜

還

亂雲人去紅山北荒磧冰堅黑水西

酬春林

雪海千年人跡少冰梯萬仞馬行難

登天山

遺壘曾屯唐士馬

唐貞觀中將軍姜行本破高昌於南山有碑

殘碑猶識漢山河

漢燉煌太守裴岑誅呼衍王於巴里坤有碑

唾壺恰貯靈芸淚然釜誰憐子建才

紅豆

愛我深情同營鮑驚人佳句壓錢劉

寄舒春林

親心怕惹兒心慟除却平安一字無

鄉書

移來野卉千金價祇種當歸不種花

春畦

傷心最是宗畱守抵死猶呼速渡河

宋史雜詠

吳鳳徵

字舜儀號我山浙江石門人國學生有西江集
我山爲孟舉先生之族孫純清茂才之令子年十
七賦百俊士詩及南州竹枝詞名噪一時鄉試屢
薦不遇乃就申韓之學歷游各郡縣講求農田水
利并纂修志乘爲人美鬚髯儀容修偉性孝友與
伯兄仲兄相敬愛誓不分析年五十卒著有西江
集八卷生平遊蹤多在江右故以西江名集令子
小我朝在馮子良大令幕中子良寄西江集來余
爲錄其詩并據來書約舉其事略焉

聽松廬
文鈔

標題 走狗烹 孺子臺 豐城劍 凌忠介公

焚餘札稿 辛稼軒先生墓

皆七古

走狗烹

鹿已死羽已平乃公無賴尤無情謬言豁達大度
主刻酷曾不殊秦嬴趙醢誅夷猛士盡高臺歌風
空悲鳴君不見分我一杯羹讀史千載心神驚父
子之際尙如此走狗功高那不烹

史稱漢高豁達大度人無異辭吳我山獨以爲
謬高臺歌風人以爲快意我山獨以爲悲鳴蓋
諸將旣誅慮無人能守窺見漢高心事

聽松廬詩話

虞兮

匝地聲來盡楚歌
美人不入漢山河
英雄自古皆情種
試聽重瞳喚奈何

美人不入漢山河
七字寫虞兮
以身殉主真能不負項王後世
貳心之臣身事異代者
視虞姬

得無有愧

聽松廬詩話

摘句 秋深風入樹人靜月留天

船遲風轉逆心急路添長

幾樹綠楊皆入畫
數家茅屋自成村

生成淡性真同水
不染纖埃便是仙

水仙

對酒渾忘過十月看花何必定重陽殘菊

昔人句云有菊卽重陽我山句云看花

何必定重陽皆爲賞菊助興聽松廬詩話

何妨下伍偕樊噲畢竟矜才傲沛公淮陰侯傳

淮陰矜傲詠淮陰者未見指出聽松廬詩話

太子何須成羽翼衣冠豈足動高皇四皓

立儲大事豈疎野所能贊助高帝寵愛

戚姬難於面違其意故設此以絕其望

衣冠豈足動高皇一語已燭其僞同上

千个芭蕉竹萬个二分明月水三分

招茂章

字郁文號桐坡廣東南海人有橘天園詩集

父喬林公生三子長禹章元配陳氏出次進章庶室鄺氏出君最少繼室梁氏出君七歲失恃十四而孤少就學四書五經已成誦通大意既長淡於世榮以延師教子爲事間與同志爲詩酒棋茗之會遇事託諷一寓於詩素嗜古文尤愛六一先生讀瀧岡阡表感念所生潛然出涕因作記訓諸郎君勉以力學揚名君伯兄禹章先卒其孤祥徵娶陸氏生子光佐而祥徵亡光佐娶蔡氏生二子而

光佐亡未幾光佐所生子亦亡陸氏欲擇繼屬意君之長子君恐以財產之故啟仲兄之嫌因以仲兄之子名揚繼伯兄使婦潘孺人力贊之陸氏乃允旣而名揚生子繼祥徵於是禹章無孫而有孫陸氏無子而有子族人咸謂君能友于兄弟也其調處得宜也能遠利也君篤信青烏家言稱其友蘇南樵善相地遂與南樵求善地葬母梁太君及其配潘孺人又勸仲兄改葬陳鄭兩太君比啟墓果爲水蟻所侵蝕又葬從兄從子之無嗣者數棺其宅心行事類如此君卒於嘉慶己卯享年五十

有一配潘孺人先君卒繼室伍孺人子四人長子
庸嘉慶丙子科舉人次子恕三子幹俱潘孺人出
四子懷伍孺人出君所著詩四卷雜文一卷論語
書說一卷家訓隨得錄一卷詩話一卷人生地理
必究一卷

招桐坡墓誌
蘇孝廉琇撰

熊笛江孝廉

景星

贈桐坡詩云橫溪丈人詩爲命

生平作詩有真性高詞大句不師古胸次出奇

復正卽此四句桐坡爲人與爲詩俱見

聽松廬
詩話

桐坡有句云雲淨見天骨又句云雲垂四面天如

城善寫雲卽善寫天上

同

桐坡詩有質直之氣亦有得諷誡之意者錄數首

於左

聽松廬詩話

雜詩

儒者坐談易每好論古人吹毛求其疵以刻爲奇
新我欲節取長尙論須設身不忠莫論忠非仁莫
論仁芝麓貶鐵槍笑柄貽千春

古器莫如月誰知其來由豈特薄秦漢還先夏商
周隨日變圓缺隨人增喜憂百蝕不少化如鏡還
如鉤萬金占不得無一錢可求我懶不具燭長夜
偕之遊顧影結三友邀月同勸酬

明皇遊月宮偶遇姮娥顧一人說夢話千秋作典
故信之固爲愚辨之亦是回古如此類者安可復
計數蝴蝶爲莊周此理好誰悟

去草如去奸養蘭如養子護蘭急去草草盡蘭亦
死忍隱固滋蔓鹵莽亦終否不見漢唐末遺恨滿
青史

工虞水火職古聖猶分司才德天所賦十哲各有
宜奈何後世官六部多兼之但聞叩首謝幾見捫
心辭位高雖云喜素餐難免譏黃霸爲宰相聲名
遜前時

士君子問世能爲何如人苟無太公才何如終渭濱所以嚴子陵絕勝殷深源

問月

明月幾時有李白問天天答否明月幾時無邵雍之論終虛誣大抵無人先有月月終後死人先滅呼之爲月始誰人窮荒之外又何說人間荒遠尙難稽天上渺茫安用詰人如無古不成今月到極圓都要缺入地升天秋復春照富何嘗不照貧我今能見古時月他日我終成古人頭上有月樽有酒不飲胡爲空尙口擎杯仰不愧青天一醉何須

計升斗

山居

一條紅葉路直到野人家
甕底已無酒籬邊猶有
花遠泉歸澗急高竹出林斜
莫怪詩情懶涼風夢
正賒

勗功寬

有守何愁賤無恆真是貧
勤勞收嗜慾磨鍊出精
神太逸易生病嚴寒將轉
春梅花飽冰雪香故絕

羣倫

中四句大有名理宜
錢金粟學上亟稱之

功卽子庸寬卽子恕時子懷尙幼故未勗及之

子庸不羈之才畫蘭竹蟹皆有名所製粵謳傳
唱一時善騎射爲縣令得民心子恕子懷皆工
詩畫一門競爽迭奏壘麓洵克家子矣

老漁
閒話

寄叔兄絢雲

兄畏熱多露宿

七言詩當家書寄二字平安慰旅衷老母笑談猶
似舊幼孫麻痘已成功避炎榻勿移當露闕捷帆
休使盡風世路畱餘容易過須知能忍是英雄

偶成

能三不朽斯千古過眼浮榮豈足榮堪笑一時僥
倖輩竟將科第作功名

摘句 名譽震一時曾否問幽獨

真樂無定在隨人各領之

衣食苟不缺得天固已深營營不知足無
乃虛光陰

靜思天地心爲人亦太備耳目有聰明口
舌識滋味更益以心思籌度靡不至恐其
用過勞復養以宵睡體天愛人心人何可
自棄

如何逢蝕候都在極圓時

月蝕

功輸齊相大惠及鄭民深

子產

國朝詩集卷之三
兒歡逢是日母難想當年

生朝

風急雲生翼池空月點睛

山林知事少文酒得朋多

滿意人原千古少感懷詩每九秋多

畏俗事憑妻料理喜新詩教女吟哦

矢口動論當世事平心堪擬古何人

見花輒乞貪難免愛樹期生惑未平

英雄末路每孤往名士暮年多苦吟

如何脫手西歸日不獨言無淚亦無

悼亡

可知福到清爲最不是神仙認不真

寫懷

陳雲

字仲卿廣東番禺人諸生官揭陽縣教諭有海騷集

仲卿天資穎異纒綵卽能屬對年十三讀徧十三經至二十則廿一史略已過目而於兩漢書南北史尤習熟焉伊墨卿太守曾賓谷方伯皆奇其才以鳳雛稱之弱冠補博士弟子員屢試不售入都應京兆試復不遇所喜旣登泰山觀日出又由山右度太行登嵩嶽於是詩之風骨益伉爽適健至於名場蹭蹬壯志銷磨萬里歸來而昔年豪狂兀

傲之氣亦大減矣晚歲以明經候補訓導署揭陽教諭後家居數載病卒年六十八生平慕鄺湛若之爲人以鄺詩集名嶠雅故自名其詩曰海騷又顏其齋曰鄺齋著有海騷十四卷感遇堂駢體文

四卷鄺齋隨筆四卷

松心文鈔

仲卿天質秀穎十齡卽工吟詠稍長伊墨卿太守見其詩奇之由是知名近又爲曾賓谷先生所器重贈詩以小鳳凰爲喻其辭有云文章誠藻耀音聲如玉璫曷不覽九州去作千仞翔

嶺南羣雅

仲卿甫弱冠卽刊詩問世後爲曾方伯賓谷先生

選定乃更名海騷其題辭有云交廣故楚庭謳吟
多楚聲工愁復善怨無過陳仲卿又云吾於千載
人獨不解長吉本無騷人遇而有騷人筆懷古何
綿綿傷時何戚戚前賢萬行淚盡向錦囊出仲卿
將毋同吾勸君不必觀此可知仲卿詩

嶺海詩鈔

仲卿寄伯兄詩云無端又度九秋天書與飛鴻竟
渺然亦有傳聞來嶺嶠祇言搖落滯幽燕五年夢
隔關山遠萬里心同日月懸堂上老人思汝甚黑
頭今已變華顛一氣轉折痕跡渾融數百年來不

多見之作

嶺表詩傳

余送仲卿北遊句云我狷君狂情性異古人相見
期無愧仲卿途中見懷句云各懷志節共千古遑
問立身誰狷狂古人相見期無愧一語可泣淚數
行仲卿放蕩不羈性情各別然胸羅千卷筆有六
朝詩及駢體皆可傳此才亦未易多觀也

聽松廬詩話

標題

荻港弔黃忠桓公

五古

清水塘

弔余忠宣公

金陵登報恩寺塔作歌

揚州謁三賢祠

哭先師伊墨卿太守

日觀峯觀日出放

歌 里中五子詩

張孝廉維屏

斯總

張教習思齊

何明經元

劉孝廉華東

以上七古

摘句

故人多不達名士例工愁

神仙本無樂何事欲追尋

擬古

百年古性情五色繡肝腸

讀鄭莊
若嶠雅

釵三婦豔裘屨六朝人

寄潘正亨

地解何人索春愁努力擔

贈吳蘭修

小草敢談天下事大丹難駐少年身

未逢謝朓休低首願學陶潛不折腰

安得故人同作樂可憐芳序已投閒

約遊
不果

回日定應增馬齒去時原未約刀頭

將之
京師

豈有功名酬物望竟將兒女累衰親

舟中
夜話

砥柱三門隨地出崑崙九曲自天來

孟津渡河

智慧或增經事曰因循易過少年時

留別諸生

知白守雌原退步却教宣聖歎猶龍

讀老子

一種清談擅名理有人持此誤蒼生

讀莊子

只合放懷稱酒帝豈宜努力作詩囚

寄鍾啓韶

袁粲偶要人士飲陳遵同過左君家

和周三燮

百歲早知生計少五倫真見死人多

古今七律中有驚心動魄之句此其一也

聽松廬詩話

名色已經名士得不曾孤負一年春

名士不易言名色尤不易聞黃仲則好色其色尋常想仲卿所云大都若是

劉秉貞

字竹琴湖北黃陂人諸生有春華堂詩存

竹琴嘗以詩受知於詹湘亭大令

應甲

又與馮石

農鹺升

祖昌

爲莫逆交石農在楚北嘗延竹琴課

子展雲太史

譽驥

昆季咸受業焉竹琴屢試不遇

硯耕餬口鬱鬱以終年僅三十二論者惜之癸卯冬展雲將北上過余言別袖中出一卷語余曰此先師遺詩也請先生選輯刻入

國朝詩人徵略庶不至身名俱滅則先師受賜多矣余諾之乙巳秋展雲玉堂歸娶見余則又諄諄及

之其篤於師門如此因綴數言於簡端而摘其警

句於左

聽松廬
文鈔

竹琴七言詩多緣情綺靡之作而五言頗清迴偶

錄二律云一徑白雲裏亂山堆四圍溪聲送涼月

露氣逼秋衣林鳥語初滑野花香正肥此中無世

味得句卽禪機

清秦
寺

高閣不知暑四圍松竹陰

天風散花氣潭水淨詩心小坐煮新茗清談酬素

琴悠然愜幽賞歸興寄秋吟

地藏
閣

摘句 一徑野禽跡數聲清磬音

江光入襟袖雨勢壓城樓

斜門通曲水破屋補遙山

關河入鄉夢身世托孤舟

命蹇文章賤家貧骨肉疎

著書消白晝采藥到青山

江山閒弔古風雨靜論文

生氣銷三字忠魂護兩宮

岳忠武墓

碧水到今半池淚青山依舊六朝痕

余忠宣墓

夕陽影裏畱僧話黃葉聲中到酒船

十年浪跡隨蓬轉一片秋心逐雁飛

殘月曉風遊子夢荒村野店異鄉愁

何能到處皆青眼未必歸來尙黑頭

萬事莫如爲客苦一生無奈是情多

重來不倩漁翁引指點青山自放船

桃源圖

惆悵西風閒院落有人含淚憶鞦韆

秋柳

吳山秀

字人虬號晚青江蘇震澤人貢生

晚青詩稿甚富其孫攜入粵久遂散失

懷舊續集

摘句 貧能安分非無學詩取言情不論才

詩緣乞米言多拙錢果通神見亦難

百年笑我長爲客一事輸君少讀書

陳大琮

字汝璧號江洲福建同安人諸生官甯波府同知
有客中吟

君生而岐嶷八歲能詩浙江提督李忠毅公一見
有國士之目妻以女十八補博士弟子員戊午鄉
試報罷忠毅公招赴任所延師課讀君於詩文之
外繙閱三略七書及樓船陳法公又以素所心得
者親爲指授壬戌丁外艱居喪守墓服闋公再招
至浙文檄多出君手旋遵衡工例捐同知籤掣安
徽署太平府同知十三年忠毅公戰歿君矢志雪

仇呈請投効海疆巡撫阮公具奏奉

旨據阮元奏李長庚之壻候補同知陳大琮具呈投効一摺候補同知陳大琮在安徽試用有年將屆補缺聞伊妻父李長庚剿捕蔡逆陣亡該員半子之誼情願在浙投効代爲報仇旣據阮元驗明人尙明白諳曉捕務着加恩准其畱於浙江効力如果奮勉遇有同知缺出卽予補用欽此是年八月帶領丁勇出洋邀蔡逆當先奮擊迫至三沙洋十月署台州府同知十一月補甯波府同知十二月擊盜漁山洋府君挾短兵過船衆隨之斬首五級

生擒黃溫等二十八名獲其船二奉

旨交部議敘十四年四月會定海鎮盡山外洋獲盜
船二生擒陳阿榮等十五名七月率僱募商船同
閩浙舟師剿蔡逆八月奉浙江提督邱札飭同定
海鎮在北洋堵截數日蔡逆竄南洋敗死十六年
署嘉興海防同知十八年督造戰船工竣請制府
汪公委驗公曰他人督造須驗至陳君無庸也其
見信於大吏類如此君事親孝訓子嚴御下寬好
爲詩著有客中吟忠毅公之殉難也君遍徵碑銘
哀誄咸爲上石鏤板君體素壯健以祁寒暑雨冒

險海洋積勞成疾卒年三十九子四人榮春

今名渭揚

廣東候補通判榮杓邑增生榮試丁酉拔貢四川

知縣加同知銜榮植邑增生候選訓導

聽松廬文鈔

忠毅公一代偉人見君於未冠卽妙選東牀則君之器宇不凡可知也公旣歿於王事君誼敦半子名達

九重奮身濤浪之間冒險蛟鯨之側卒能以死勤事不負忠毅之知以視昔之冰清玉潤尤爲事處其難矣令子筠竹通守奉遺稿屬爲刪存旣摘錄其佳

句因識數語於簡端

同上

司馬哭外舅李忠毅公五律四首沈雄悲壯錄之
撤瑟沈餘響吹笳慘變聲遺書搜篋衍新諡上銘
旌盡瘁生平志褒忠死後名夜來頻撫劍吾欲翦
長鯨 青山歸骨地黑水結纓身古史儕良將
今皇得蓋臣握拳因報

國怒目尙驚人壁上弓刀動虛堂訝有神 蓋棺方
論定前事亦堪悲義爲同仇激忠惟

聖主知恨畱南八箭威並岳家旗死遂封侯願英雄數
未奇 十載依戎幕銜恩我最深挑燈看草檄橫
槩許聯吟將略嗟猶在心書意可尊

公著有水
流戰紀略

傳待他日千古涕沾襟

陳王洛神一賦後人以爲感甄后而作揆之當日
情事似非子虛陳江洲司馬乃爲之辨且引高唐
爲證句云高唐也是神仙事未必當時爲感甄妙
於語言真得詩人溫柔敦厚之旨

聽松廬
詩話

摘句 權歌添旅思江色入吟鬚

亂山銜落日危石激微波

鳥隨雲影盡人逐水聲忙

學癡自驚奔走久家貧轉覺別離輕

開函芸葉香猶在觸目牙籤記不清

遊天
一

萬事關心齊到枕幾番吹燭不成眠

留春憐

非常月

閏三

獻歲先逢不夜天

人散身如僧退院愁來貌似佛低眉

酒因獨酌難成醉心爲相思易感秋

曲徑花殘猶有竹訟庭晝靜慣無人

筆多遊戲詩難穩官愛清閑吏亦貧

官貧漸覺知心少米貴偏逢食指多

不信多情難作佛須知有夢卽遊仙

海外有天全大節山中遺老泣忠魂

成仁祠

猶喜山靈皆舊識相迎到處有梅花

文守元

字定斯號融谷江西萍鄉人貢生有融谷詩草

公系出廬陵文氏父諱集聖 誥贈奉直大夫妣

陳氏 誥封宜人公年十四卽孤露陳太宜人好

施與邑中善事靡不舉興己亥邑大歉減價出糶

五十餘日至有秋乃止甲辰大水施餽粥藥餌梘

枮全活甚衆建學使試舍建育嬰堂建誠齋公家

廟凡所作皆公克承其志太宜人卒建文昌宮復

爲太宜人捐興賢田租八百把癸亥大旱復減價

出糶乙丑修 上諭亭丁卯增修郡城學宮庚午

大水助設粥廠乙亥分修縣城丙子分修省闈號
舍己卯議修如願塔未就而公病先是語人曰歲
至庚辰吾有大厄踰八月朔始免竟以七月十三
日卒城旣次狀竟因作而曰凡此皆公之常行非
公之至也鄉里自好者或能之孟子曰有一鄉之
善士一國之善士天下之善士如公者蓋天下之
士而績偶著於一鄉者也閒嘗與公酒酣縱論天
下利病及古今治亂興衰之故山川道里阨塞險
要戰陣之所宜覩縷陳數如指上羅紋又常登秦
岱涉衡湘四方瓌奇瑰異之士無不推襟迭抱此

豈無意於世乘下澤車騎款段馬使鄉里稱善人
如馬少游所云者遽已耶夫干將鑢錙不可以補
屨怒猊香象使之抉石截流其微全力至其摧伏
負荷艱鉅之任則非憑藉有所表著亦終無以自
見於天下故公之可述者僅如此嗚呼可哀也已
公弱冠以冠軍補博士弟子授明經嘉慶元年邑
舉孝廉方正公辭不應太宜人卒卽絕意仕進所
著有請業錄二卷四塞賦一卷內外詩集各二卷
娶林氏子七熾邑庠生次烜福建平和縣巡檢次
騫郡庠生先公卒次晟己卯舉人 景山官學教

習次鴻廩膳生次鵠邑庠生次鸞

文融谷墓誌
姜明經城撰

四塞紀略賦一卷萍鄉文守元撰自序云

聖朝統馭萬方聲教所及靡遠弗屆此賦於起結寓贊
頌中間所敘乃各國事區而分之首天時次地輿
山川次城郭宮室因而紀代傳貢獻次儀制官職
因而紀刑罰稅課武備音樂而人民廬里居處方
言次焉服飾飲食婚姻風俗又次焉爰及土產貨
貝器用而終以鳥獸魚蟲草木凡二十六段以上
自序
此賦每句皆自註皆註明見某書以簡馭繁有條

不紊洵爲賦中鉅製云

松心
日錄

文融谷先生建業懷古詩云龍盤虎踞古來雄今
日江流依舊東三國戰爭風雨裏六朝興廢水雲
中蔣侯立廟神靈在成祖遷都王去氣終王業霸
圖均莫問鳳凰臺倚夕陽紅三千年成敗廢興隱
括以五十六字

聽松廬
詩話

余不善書索書者不絕友人勸索價或可少索書
余不肯爲也今讀融谷先生詩云一書再書書未
了索書索債同一視或者愛錢不愛字日寫日少
如吾意蓋先生爲索書者所苦戲欲沽價冀可少
索此數語恰如吾意所欲言

松軒
隨筆

文叔來刺史晨宰吾邑有循聲時余里居未相見

也迨去任乃晤談越日以家集數種見示今讀贈

公融谷詩草知其學術本乎經史善行著於鄉閭

嘉慶元年舉孝廉方正公力辭不應公母陳太宜

人壽八十有四親見五世同堂嘉慶五年蒙

恩賞眉壽延慶匾額洵德門之盛事亦倫紀之美談也

聽松廬

文鈔

摘句 各自舒性情不必別同異與劉金門宮保論詩

誦陶至飲酒能使懷抱清

望遠雲歸岫懷人月到門

樹影涵山氣江聲湧月華

牕前明月無今古天上浮雲有去來

太公未著陰符策伊尹惟陳說命書

讀武侯集

工部詩篇朱子學武侯心事岳家軍

讀先信國

公集

一庭配享皆忠節兩字親題有墨莊風雨

河山增感慨六陵不復在錢塘

岳王墳

南宋諸陵爲楊璉真伽所發義士唐珏潛易其骨改葬蘭亭山下

籌邊豈愧文成策和議原非武穆情

于忠肅墓

與我共傾新釀酒同君且話未忘書

友人過訪

程 楹

字立庭號笠亭江南海州人有笠亭遺詩

笠亭與難兄南野秋浦皆詩人也南野好游秋浦

好畫獨笠亭專力於詩

龔榆山房筆譚

摘句 花明猶帶雨松老不知秋

山深遲見月寺遠不聞鐘

白雲村外路黃葉雨中山

風來喧澗水雨過落松花

遇酒不辭非避俗見書思買卻忘貧

數間茅屋無尋處行盡垂楊始到門

謝 竣

字位中號秋卿江南海州人有酒醒夢覺軒集

呂叔訥爲海州校官見秋卿文歎爲文輒復生顧
以馬筴依人另換一副筆墨非所好也而翩翩書

記遂已譽滿兩淮

弁榆山房筆譚

標題

義僕行

許石華師家有老僕毛貴能識大義嘗挈千金行數千里目不邪視

摘句

枯坐繁華地閒吟冷淡詩

佳句忽來因醉得名山無分亦神馳

事因作客心常細論到英雄膽便癡

君行定獻長楊賦我輩能無折柳詞

餞陶柳村

李 棟

字萼芳號怡堂江南海州人諸生有萼芳詩鈔

怡堂善讀書亦善著書其書滿家哲嗣繼綱集其

古今體詩先付梓人

介榆山房筆譚

怡堂著作如古史參要胸志補遺藝文彙編同居

記多男考古泉辨壽考記同姓名記賞心集經籍

約選多至百卷

萼芳詩鈔序許喬林譔

摘句 細雨低迷沽酒路春風吹暖賣花天

論交萬里思欣仲

陶欣仲官嶺南

談古三朝得孟

堅

吳孟堅三次就談經史

楓葉臨江紅到水梅花帶雪白連山

曾從儒教參禪教本以文人作上人

贈友入釋

著書甘苦常同席謀食生涯暫作田

詠硯

夜半高吟天地靜蛟龍驚起石潭邊

怪道詩人容易老送春纔過又悲秋

許蓮

字東田江南海州人貢生官縣丞有知白齋集

東田試輒高等貢入成均文名藉甚

弇榆山房筆譚

摘句 有酒興可遣有書俗可醫看山讀奇畫玩

月吟新詩卽此自足適無求人世知

朱照

字古愚號野鶴江蘇海州人官布政司理問有野鶴詩鈔

道蘊三篇朱照撰 三篇於養生納氣頗能舉其要茲撮錄數語於左

上篇 人身三寶精氣神 引氣歸臍所謂凝神

入氣穴也 前對臍門後對腎中間有個真金鼎

人未生此身先生此竅真意必須歸入此竅所謂

送歸土府牢封固也 煉精化氣煉氣化神 以

意存想 引氣下達以助命門之火

詳見頤道老人蓮花筏

中篇 念起即覺覺之即無 常要回光返照使

神御炁使炁歸神 心者神也神即火也詳見虛白子

下篇 我心自有佛 得入路又須出路詳見禪宗語錄

野鶴學道三十年深得性命雙修之旨斧榆山房筆譚

陶柳村曰朱古愚少壯時能濟人之急拯人之危

吾師許石華先生稱其佛心俠骨可想見其生平

矣晚年深入道奧嘗終日端坐不發一言壽過八

旬怛然坐化蓋其於道實有所得也松軒隨筆

摘句 看山不喜平茲山平亦好平山堂

只須隨力多行善萬善同歸一處圓

陳瑜

字子醇號春泉江南海州人同知銜有蘋香閣集
春泉才大於身神清澈骨五官並用三絕擅長弱
冠治鹽筴以才子氣化金銀氣旣而腰纏十萬日
空四海詩仙吏隱投轄如歸

介榆山房筆譚

摘句 詩難題隱恨酒不解真愁

書能醫俗須多讀語不驚人莫妄談

思買青山成小築爲娛白髮著斑衣

怕將離况筵前敘恐惹相思別後深

茗岡柳村

清酒一尊人對坐碧天如水月團圓

張文渭

字磻溪號秦川江南海州人貢生候選訓導

秦川天性孝友品學粹然受知學使莫寶齋侍郎
以第一人入泮萬和圃侍郎歲考食餼鄉闈屢薦

不遇州有五龍河漸淤夏秋水發數十鄉被水秦

川創捐興修親董其事鄉免水患他善事多類此

與陶柳村交篤秦川歿柳村爲作傳

聽松廬文鈔

摘句 隱隱孤燈似豆紅半窗簾外月朦朧可憐

一夜思千遍片夢何曾到粵東

病甚書寄柳村

柳村見詩哭失聲卽裝冊徵友人題詠見
者愴然增友誼之重焉 聽松廬詩話

古驛馬嘶山雨暗夕陽帆挂海雲低

胸城晚眺

勵志惟期同漱石忘貧從不計分金

雷別柳村

柳村云秦川貧余尤貧秦川隨時助余不待余啟口甚至典衣助余而不使余知之茲錄秦川之詩并錄柳村之言以見今人而行古道窮交而真友誼有如此者

松軒隨筆

方雲龍

字獻圖號躍淵廣東香山人官婁縣主簿有公餘詩

雲龍九歲失怙苦心力學應童試未遇入國學兩
赴鄉闈不售以大父宦黔曾任銅仁太守政蹟載
在縣志因有志捧檄捐縣主簿分發江蘇親老不
敢遠離旣丁內艱服闋赴蘇候補厯署江甯秣陵
司江都縣丞甘泉邵伯司句容龍潭司泰興黃橋
司寶應衡陽司槐樓司高郵界首司江都萬壽司
泰州海安司各巡檢宿遷縣東臺縣興化縣寶應

縣沛縣安東縣各典史高郵州泰州吏目道光二十二年補婁縣主簿二十八年俸滿卓異候陞二十九年秋以疾卒於任

方主簿事略

雲龍工詩於書史及唐宋諸大家詩集無不博覽尤愛白香山袁子才詩師事方子谷先生師弟稱莫逆迨筮仕江南恆以有益民生爲念淮揚州縣屢被水患承辦之員多視爲美差與吏役地保串同受賄故屢致生事雲龍奉委不辭勞苦悉心履勘一概陋規絲毫不取盡剔前弊務使窮民咸沾實惠每自矢曰余雖職卑官小力有不能爲但視

民如子人有同心苟稍存輕率必至草菅民命若
取不義之財其若後日子孫何其存心如此戊子
淮揚復大水海陵州牧查辦不善災民鬩堂於是
帶印至省請員接辦方伯賀公深悉雲龍才奈職
卑不能直署州牧特委代庖吏目兼行州事三月
有餘始將災務辦妥大憲深器重之雲龍作宦三
十餘年所至之地民皆愛戴卒之日士民同聲歎
惜少時詩多不存存者皆江南公餘所作長子守
文奉其遺草事略請劉鵬海通守轉達於余因爲
節其原文并摘句於左

聽松廬
文鈔

摘句

自有王者香豈矜顏色好

素心蘭

籬菊催秋老江風送雨來

客中重九遇雨

漢陽蠶食諸姬盡只責包茅且蓋羞

周書

可憐聽到分羹語父子天倫當戲談

漢書

葫蘆有樣何妨畫孟德魂應恨昨非

晉書

手足關心同冷煖葛裘無計共溫涼

懷虞階弟

爲貧而仕昔然矣爲仕而貧今有之

感懷

千里關山長路恨一番風雨故園思

和來

風花雪月難求伍詩酒琴棋幸有三

憶諸友

滿地落紅須護惜看花人有再來時

苦雨有作

李步墀

字誌摩號南溟一號鹿池廣東龍門人按察司照磨有伍草山房詩文集

步墀七齡解作詩文以神童稱比長博覽羣書最嗜左史莊騷時藝以古文行之兼工各體書能作擘窠大字應郡縣試輒冠曹偶縣令師保尤重其名豫以首選道意步墀曰是更甚於銜玉求售不畢試而去結茅村外顏曰伍草山房吟嘯其中栽花種竹焚香觀魚以爲樂居親喪未嘗見齒撫昆弟之子如已子有宗祠久燬創率族人重建之自

奉儉約見窮困者推解無所吝精岐黃屢起沉疴
貧者贈以藥全活無算自知壽數嘗語人曰庚辰
秋吾其逝矣至期果卒年六十著有伍草山房詩
文集一卷經史辨疑一卷庸言一卷醫的四卷子
柱蘭優廩生孫忻諸生

龍門縣志

先生性恬澹嘗賦冬菊詩以見志句云早植久爲
君子重晚香羞與美人期身雖未遇然子孫皆淵
源家學庠序蜚聲今秋次孫焜又入泮矣

聽松廬詩話

標題 登招賢峯

七古

摘句 張華勵志今猶切司馬題橋老未酬

劉炳南

字亮勤號星樓廣東香山人官府經歷有挹桐書
屋詩鈔

炳南少讀書有大志年十五隨仲兄奮南赴直隸
山海關通判任閱四年回粵應童試不售遂遵籌
備例捐未入流丁外艱道光辛丑暎夷滋事擾及
省垣大憲檄飭各屬招募鄉勇應援炳南聞命卽
自行捐貲僱拖船二十隻召募水勇五百人星夜
赴省奉檄防堵要處守禦有方大帥深器之事平

奉

旨賞戴藍翎壬寅督修香山縣城工竣交部優叙丁內艱服闋加捐府經歷分發湖南丁未冬抵長沙戊申楚南大饑大府議賑廉其才委攝長沙縣丞辦理賑務省垣設粥廠四處輪流散給并施藥餌如是者兩月全活甚衆值逆匪李沅發肆亂據新甯縣城楚撫委鹽道雷督兵剿辦以炳南有膽略特命與守備熊釗帶兵四百在縣屬之狼山村遏賊去路奈兵少賊潰圍出卽與熊釗領兵奮力追截焚燬賊巢無算到貝子岡賊伏發炳南猶力戰身受數十創遂遇害年三十六事 聞奉

自議卹炳南生平好吟詠磊落不羈之氣時見於詩燕趙

吳楚足跡所至著有壯游草置行篋中歿後散失

無存僅檢得其挹桐書屋遺詩若干首

劉少尹事略

星樓年少困童子試蹭蹬名場卒能慷慨從軍歿

於王事終軍棄繻之志伏波裹尸之言質諸古人

殆無愧矣令兄鵬海通守

奮南

篤念友于搜尋遺

稿并撰事略見示因爲輯入詩人徵略二編星樓

之忠勤鵬海之友愛皆倫紀中之嘉話也星樓嘗

有句云頭顱如許須思奮休負萱闈愛日長然則

星樓欲揚名顯親不獨忠臣亦孝子也

聽松廬文鈔

摘句

人烟寒荻岸樹色老柴扉

港口

潮平山色近風過稻花香

虎遜巖

江山聯短句風雨共長途

送杜少府

松聲千澗雨山色四圍秋

峽江寺

妙理參禪諦塵勞感歲華

自有文章能壽世何妨詩酒且陶情

酬華蓋泉

數點斜臨波照影一枝高出雪同寒

梅花

四壁青山雙塔寺兩堤楊柳六橋烟

西湖

平湖綠水三更月花港紅菱一葉舟

卅年書劍功名薄萬里關山客夢驚

書懷

鄭丙昌

字頴超號曉園廣東香山人官澄海縣訓導有叢
書閣遺草

君既遊黌序屢躋棘闈乃以廩生就教職歷署潮
陽海康教諭新興訓導時因海盜不靖志切同仇
嘉慶十四年六月上書制府百公願自行捐貲僱
募繪船出海緝捕十五年洋盜投誠招徠奔走身
任其勞是年八月奉

旨以本班先用又奉大府委帶巡船協同文武員弁巡
緝三水高要德慶封川鶴山新會順德香山等處

拏獲要犯二十餘名奉 部議加一級十七年選

授澄海縣訓導抵任卽捐俸重修學舍添置書齋

又倡建義學延師教育事載澄海縣志此外如修

築炮臺水閘及編查保甲催征錢糧縣令皆得其

襄助蓋君不辭勞不惜費故雖爲師儒之官而於

地方皆有裨益也

鄭廣文
事略

君工詩畫與伊墨卿張葯房黎二樵黃虛舟宋芷

灣諸君子爲道藝交君歿子幼生平所作多散佚

今秋令嗣平林別駕

鶴鳴

奉其遺草及事略見示

因節錄其大概并摘句刻之

松軒
隨筆

摘句

官評高月旦民望切虹霓

送邑侯許菊船先生

旭日上簾櫳春色知多少不見畫眉人空

聞畫眉鳥

閨怨

山寺鐘聲隨日落詩人屐齒爲春延

登第一峯

姓名他日城還鶴風俗如今劍易牛

哭心齋師

久知治術由經術不暇身圖爲國圖

無端橫逆須安命有限聰明且息機

送兄楚南

青衫有淚白司馬綠葉成陰杜牧之

珠江有感

烟水曠懷忘甲子江天殘夢感滄桑

老漁

翠蓋春遊向何處玉簫金管奏昌華

南漢宮詞

王嘉福

字穀之江蘇長洲人世襲雲騎尉官守備

摘句 潮來人不覺秋到病先知

斷岸舟爭流水渡破樓鐘打夕陽山

王嘉祿

字綬之號井叔長洲人諸生有冬讀書齋集

摘句 風樹聚千聲月溪澄萬象

足以下視危目因旁覽眩

登白雲峯

落葉響雙屐寒梅香一村

春水碧浮岸夕陽紅到門

喬椿

字壽林號曙村江蘇海州人諸生

生平獨喜觀劇年九十有六猶樂此不疲

弁榆山房筆譚

摘句

爾亦工愁者相依愁更生

蛩

夏啓垣

字承寬號迤山江蘇海州人貢生有自娛集

摘句

似爲此君憐薄命故教之子託虛心

夾竹桃

方權

字巽齋江蘇海州人恩貢生候選直隸州州判

摘句

隨意踏青青不了一條條路夕陽紅

湖上

洪恆

字春鐸硯香江蘇海州人諸生有課餘草

硯香髫齡孤露嗜學出於天性陶柳村別駕讀書

胸山佛寺硯香數以文就質徒步往還若有所甚

樂者

弁榆山房筆譚

柳村每談及硯香深爲歎惜且言硯香聘妻程氏

生長富家聞硯香歿卽撤其環璫誓死不嫁今已

守貞二十年親黨咸重之稱曰貞女云

松軒隨筆

摘句 雲飛山影活風過水痕涼

茶煙鶴夢入初靜月冷空山獨閉門

梅花

李光昭

字闇如號秋田廣東嘉應人諸生有鐵樹堂集

溫謙山舍人輯詩海文海秋田實襄厥事

楚庭者舊

劉樸石云嚴滄浪有詩不關學之說前人嘗闢其

非秋田詩禪吟一篇持論尤痛快

嶺南羣雅

譚玉生云秋田賞關海聲堂祀吾粵詩人張曲江

以後至黎二樵二十六人朔望必具衣冠拜之其

好奇類如此

楚庭者舊遺詩

標題 關海聲堂祀粵詩人歌 賣蕉童子歌

七古

摘句 山雲積復化大抵爲流水葛天無懷民宛

在流水裏

羅浮酥
膠材

左列億萬竹右列億萬松古梅樹錯雜前

面荷花紅主人瀛濤子奇氣凌霜空看烹

鳳麟隨酒酌琉璃鍾乃知寒儉氣不是神

仙風

酥膠
觀

好色而著書古推抱樸子

羅浮懷葛
洪鮑姑

著書傳後死壽世得先生

寄溫謙
山舍人

一生俠骨高王李五字長城逼杜韓

題四
溟集

偶陪居士隆中臥多傍才人腕底行

龍

脩到秋林作蟬噪也須風露飽平生

偶題

蕭搏上

字蘋溪廣東大埔人諸生有慈竹草堂詩存

黃琴山農部

德峻

壬午同年也博雅工詩詞道光

壬辰由粵入都舟過南昌冒雨訪余旅寓出蕭趙
兩君詩草謂余曰兩君皆懷才不遇中歲摧傷所
作詩文亦多散佚此其叢殘贖稿君爲輯入詩人
徵略中以存其人亦我輩爲友朋不容已之事也
余於兩君交疎而琴山之篤於友誼可謂生死不
渝者矣旣輯兩君警句因并識之

聽松廬
詩話

新甯縣有石洞宋景炎間太守巫公築延暉亭左

刻碁局右立釣臺蕭蘋溪有句云滄桑代遠畱碁
局山水風高寄釣臺出語工切渾成余欲告知其
邑人書此一聯刻于延暉亭但不知亭猶存否同上
摘句 美人戀別遺芳珮詞客銷魂賦大招

遙天綠暗人如夢野館春深味似秋

小鳥勸人歸去好幽花期我老來嬌

老來嬌卽老少年卽雁來紅
此七字之妙可稱黃絹幼婦

朝梁暮晉知何許道是鬚眉亦靦顏

趙節婦詩

鬚眉而爲貳臣有愧於巾幗之節
婦余有句云當塗典午多卿用賦
恐捫心愧綠珠與此二句
同一用意 聽松廬詩話

明瑞

字筠亭滿洲人襲封公官兵部尙書死難緬甸諡

忠烈有北窗吟稿

摘句

寒分百戰袍渴共一刀血

送弟瑤圖使烏斯藏

騷客興隨秋水遠故人書報菊花開

九日

兆勳

字牧亭滿洲人有牧子詩錄

牧子詩錄其友福增格爲之編次

欽定八旗通志

摘句

月明秋作色柝響夜操權

月照梨花詩夢冷隔簾人影瘦春燈

劉步蟾

字羽樵廣東三水人諸生有沙鷗吟舫詩鈔

譚玉生云吾粵花埭風景絕佳羽樵有句云看花

蝶與人爭路臨水鷗隨艇到門可作楹帖

楚庭耆舊續集

摘句 白雲有聚散明月有圓缺不如深山松上

積太古雪

才能壽世何妨死憂本傷人竟爲貧

舟車果是傷離物杵臼真成耐久交

憂無可遣須埋地事有難言只問天

長鏡託命生何恃短鐻隨身死便埋

蔡廷榕

字季材廣東南海人貢生有古琴室詩鈔

譚玉生云季材詩工愁善怨則境遇爲之

楚庭者舊遺詩

摘句 花落存故枝人窮存故吾

江長流夢短愁重壓舟輕

才高妨命達家遠得身閒

漸老酒人仍跌宕倦遊豪氣半銷磨

疎頑已分逢迎拙悔悟翻緣閱歷多

書如良友肯相對月似美人能獨來

客懷

獨自挑燈真似夢何人聽雨不思家

雨夜

甘運源

字道淵漢軍人官廣東巡檢有嘯崖詩存

摘句

雲連鬼谷洞雨暗竹郎祠

夾江晚泊

病閒浮白手雨冷踏青心

春懷

碣石尾蟠滄海斷居庸首擁太行來

燕臺秋興

山圍望帝千年國樓鎖籌邊萬里風

登成都城

甘運瀚

字子瀨漢軍人有舞蔗軒稿

摘句

人爲萬物秀毋亦一羸蟲

慷慨辭燕市悲涼動越吟

下第

鄧泰

字心蓮廣東順德人諸生有心蓮詩鈔

譚玉生云余與心蓮交最先嘗爲其詩序有云生
涯則鐵板銅琶况味則殘杯冷炙孰謂文章千古

惟傷哀樂中年心蓮年四十一卒

楚庭耆
舊續集

癸巳五月十八日西潦直決桑園圍堤基陡潰三
百丈轉瞬高岸成陂池水纔及脰倏滅頂高逾竟
丈封門楣富豪力可具舟楫貧賤命自同沙泥

粵東水患可慮讀鄧君詩爲愀然者久之

聽松廬
詩話

摘句 狂甘斯世忤貧怕老親知

錢瑤鶴

字子霞江蘇長洲人國學生有敝帚草

摘句 坐久惟紅雨來遲又綠陰

臨風鳥度銷魂曲帶雨花如小病身

千花簇擁成香國一水灣環是愛河

蘇州山塘

汪松

字蒼巖漢軍人官佐領有早閒堂詩集

摘句 千年初闢路百里不逢人

瀋陽

老添兒女累貧使故交疏

元日

魚腸欲雪先王恥馬骨能傾國士心

金臺懷古

趙國柱

字石臣廣東高要人諸生有花南書屋詩存

石臣嘗繪一圖小像居中旁列一老僧一劍俠一

美人自題一詩復邀友人題詩其性情意趣儼

不凡可以想見

松軒
隨筆

石臣警句甚多五言如眼中人落落身外事茫茫

七言如大有英雄埋草莽豈無肝膽識風塵可想

見其慷慨激昂之概近日彭春洲明經輯端人集

無石臣詩蓋不知石臣爲端州人也若非琴山收

其遺稿則此零章斷句非化爲灰燼卽飽諸蠹魚

昔人云一介之士必有密友友道之繫於人豈徒
聲氣之求金蘭之契蓋觀於生死之分幽明之判
而友道之重乃愈見也因覽石臣遺詩偶識數語
石臣七言絕句有風致絕佳者錄數首於左

紅藕香中翠袖攜亂蟬聲裏夕陽低采花莫采田

田葉恐有鴛鴦並翼棲

采蓮曲

一路香風送稻花

村南村北酒帘斜板橋行盡松陰徑門對清流第

二家

窯溪晚歸

絲管沉沉酒未醒忽看新月照春城

一年一度初圓夜不信姮娥不世情

上元夜喜晴

輕

雲如錦露如珠烏鵲填橋事有無若果銀河雙照

影廣寒應歎素娥孤

七夕聽松廬詩話

標題

清明日憶故園廬墓

珠江曲

五古

梁烈婦詩

長短句

摘句

親老兒尙孩兒壯親已故不見白頭人惟

見白楊樹

遊山不宿山未竟煙霞趣

出山雲選樹入戶月依人

岸添春水闊山帶夕陽高

樹陰移岸曲帆影壓波涼

僧爲詩弟子佛是古先生

秋士原多感名山未易藏

人間快事談何易天上愁心寄最高
酒得力時人放膽花無言處佛開顏
美人明鏡芙蓉老秋士羅衣薜荔寒
金釵繡佛兩無礙荷露松風俱有情
風定波光浮岸白雨餘山色過江青

金城

字竹村江蘇吳縣人諸生有蓀壁山房詩草

摘句 寒燈明遠岸新月候柴門

醉中身世忘貧賤夢裏親朋雜死生

莫廷翰

字奇勛號之屏廣東番禺人增生有寸心知草

先生績學敦行少學文於郭解元雄圖乾隆戊戌
受知李雨村學使補弟子員嘉慶戊辰歲考一等
補增生鄉闈八薦弗售里居授徒歲常數十人同
邑林月亭孝廉伯桐杜洛川廣文游尤稱高足云
生於乾隆甲戌終於道光丙戌年七十三子二愈
昭候選通判愈晴孫若僎若佑若脩候選布政司
經歷曾孫如琮如潤如瓊如珍

柳堂
文鈔

自古老師宿儒授徒設教或被榮遇或享高名兩

漢以來指不勝屈迨前明專以八股取士而八股
之工拙在於戰藝者一日之經營科第之窮通決
於衡文者片時之好惡其間鴻儀用吉固不乏人
而蠆屈終身更復不少如莫翁八薦弗售可慨也
然諸孫中如若脩者能尊賢取友述其祖德貽以
令名則君子之澤或顯於後人未可知也

松心
文鈔

摘句

滿園風月原無價一枕羲皇自有真

乍疑羣卉真無色但覺空山不斷香

梅花

冷落繁華安所遇風霜雨露總由天

春菊

濁酒已傾亡國淚名花猶上美人頭

素馨